

**ՕՐԵՆՔԸ**

**«ՍՆԱՆԿՈՒԹՅԱՆ ՄԱՍԻՆ» ՕՐԵՆՔՈՒՄ**

**ԼՐԱՑՈՒՄ ԿԱՏԱՐԵԼՈՒ ՄԱՍԻՆ**

**Հոդված 1.** «Սնանկության մասին» օրենքի 2-րդ հոդվածի 1-ին մասը լրացնել «թ» կետով՝ հետևյալ բովանդակությամբ.

«թ) Հայաստանի Հանրապետության փաստաբանների պալատի»:

**Հոդված 2.** Սույն օրենքն ուժի մեջ է մտնում հրապարակմանը հաջորդող տասներորդ օրը:

**ՀԻՄՆԱՎՈՐՈՒՄ**

**«ՍՆԱՆԿՈՒԹՅԱՆ ՄԱՍԻՆ» ՕՐԵՆՔՈՒՄ**

**ԼՐԱՑՈՒՄ ԿԱՏԱՐԵԼՈՒ ՄԱՍԻՆ ՕՐԵՆՔԻ ՆԱԽԱԳԾԻ ՎԵՐԱԲԵՐՅԱԼ**

Սույն օրենքի նախագծի ընդունումը պայմանավորված է փաստաբանության ինստիտուտի հատուկ իրավական կարգավիճակով և գործունեության հանրային - իրավապաշտպան բնույթով:

2015թ. սահմանադրական բարեփոխումների արդյունքում փաստաբանության ինստիտուտը ձեռք է բերել սահմանադրական կարգավիճակ, որի գործառնումն ուղղակիորեն աղերսվել է իրավաբանական օգնության ստանալու անձի հիմնարար իրավունքի հետ, որպես այդ իրավունքի իրացման հիմնական սահմանադրաիրավական կառուցակարգ:

Մասնավորապես, ՀՀ Սահմանադրության 64-րդ հոդվածի 2-րդ մասի համաձայն՝ *իրավաբանական օգնություն ապահովելու նպատակով երաշխավորվում է անկախության, ինքնակառավարման և փաստաբանների իրավահավասարության վրա հիմնված փաստաբանության գործունեությունը: Փաստաբանների կարգավիճակը, իրավունքները և պարտականությունները սահմանվում են օրենքով:*

Սահմանադիրը, ըստ նշյալ իրավակարգավորման, փաստաբանության ինստիտուտին վերապահելով սահմանադրական կարգավիճակ, նաև սահմանել է փաստաբանության բնականոն գործունեության համար անհրաժեշտ երաշխիքներ՝ ի դեմ անկախության, ինքնակառավարման և փաստաբանների իրավահավասարության սկզբունքների:

Փաստաբանության անկախության և ինքնակառավարման սկզբունքների պատշաճ իրացման համար խիստ կարևոր է այդ ինստիտուտի անկախությունն ու ինքնաբավությունը պետությունից՝ ներառյալ փաստաբանության ինստիտուտի ֆինանսական կայունությունն ու ինքնուրույնությունը:

Ելնելով ՀՀ Սահմանադրության 64-րդ հոդվածի 2-րդ մասի իրավակարգավորումից՝ ընթացիկ օրենսդրությամբ՝ «Փաստաբանության մասին» օրենքով մանրամասնորեն կարգավորվում են փաստաբանության գործառնման կառուցակարգային և գործնական հարցերը: Ի մասնավորի, նախատեսված է Հայաստանի Հանրապետության փաստաբանների պալատը՝ որպես փաստաբանության և փաստաբանների ինստիտուցիոնալ ներկայացուցիչ:

Մասնավորապես, «Փաստաբանության մասին» օրենքի 7-րդ հոդվածի 1-ին մասի համաձայն՝ *Հայաստանի Հանրապետության փաստաբանների պալատը (այսուհետ՝ փաստաբանների պալատ) սույն օրենքի հիման վրա ստեղծված փաստաբանների մասնագիտական, անկախ, ինքնակառավարվող ոչ առևտրային կազմակերպություն է, որի առանձնահատկությունները սահմանվում են սույն օրենքով: (...):* Նույն հոդվածի հետագա շարադրանքում ամփոփված են Պալատի գործառույթները, որոնք վերաբերում են փաստաբանության գործունեության կազմակերպմանը, աջակցմանը, փաստաբանների և ունկնդիրների ուսուցմանը և այլն:

Գործառույթների այս համակարգի ուսումնասիրությունը ցույց է տալիս, որ Փաստաբանների պալատը փաստաբանական ամբողջ համայնքի ներկայացուցիչն է և փաստաբանության սահմանադրական ինստիտուտի կարգավիճակի իրացման կառուցակարգային պայմանների ապահովման պատասխանատուն: Պատահական չէ, որ նշյալ օրենքի 9-րդ հոդվածի 1-ին և 3-րդ մասերով և 10-րդ հոդվածի 1-ին մասով հստակորեն սահմանված է, որ Փաստաբանների պալատի բարձրագույն մարմինը՝ փաստաբանների ընդհանուր ժողովը, կազմված է բոլոր փաստաբաններից, որոնք ընտրում են Փաստաբանների պալատի գործադիր մարմինը՝ Պալատի խորհուրդը:

Վերոնշյալ համատեքստում Փաստաբանների պալատի վրա դրված է փաստաբանության ինստիտուտի և փաստաբանների շահերի ներկայացման, պաշտպանության և գործունեության կազմակերպական ապահովման հիմնարար

գործառույթները՝ առանց որոնց՝ փաստաբանության ինստիտուտը թե՛ գործող օրենսդրության համաձայն և թե՛ գործնականում չի կարող գործել: Հետևաբար, խոսելով փաստաբանության անկախության և ինքնակառավարման սահմանադրական սկզբունքների իրացման մասին՝ ընդհանրական մակարդակում նախևառաջ նկատի են ունեցվում Հայաստանի Հանրապետության փաստաբանների պալատի անկախության և բնականոն գործունեության երաշխիքները, որպիսիներից մեկը ֆինանսական կայունությունն ու ինքնուրույնությունն է: Վերջինս պետք է ներառի նաև Պալատի հնարավոր ֆինանսական խնդիրների պարագայում պաշտպանության որոշակի կառուցակարգեր, ինչպիսին է՝ պաշտպանությունը սնանկությունից:

«Սնանկության մասին» գործող օրենքի ընթացիկ կարգավորումներով Հայաստանի Հանրապետության փաստաբանների պալատն ընդգրկված չէ սնանկության ոչ ենթակա սուբյեկտների շարքում, ինչի հետևանքով ստացվում է, որ ՀՀ Սահմանադրությամբ նախատեսված մարմնի գործունեությունը կարող է սնանկության վարույթի արդյունքում դադարեցվել՝ սովորական օրենքի հիման վրա, որպիսի իրողությունը հակասում է Սահմանադրության բարձրագույն իրավաբանական ուժի սահմանադրական սկզբունքին և նորմատիվ իրավական ակտերի աստիճանակարգության համակարգին, ինչպես նաև փաստաբանների պալատի՝ վերը նկարագրված կարգավիճակին:

Առաջարկվող իրավակարգավորմամբ առաջարկվում է «Սնանկության մասին» գործող օրենքում սնանկացման ոչ ենթակա ինստիտուտների շարքում ընդգրկել նաև Հայաստանի Հանրապետության փաստաբանների պալատը: Նման մոտեցումը, մի կողմից, կբխի Պալատի սահմանադրական կարգավիճակից, քանի որ ՀՀ Սահմանադրությամբ նախատեսված ինստիտուտի գործունեության դադարեցումը՝ ներառյալ սնանկության վարույթի միջոցով և արդյունքում, չի կարող իրականացվել սովորական օրենքների միջոցով, իսկ, մյուս կողմից, օրենսդրական երաշխիքներ կստեղծվեն՝ երաշխավորելու Պալատի նշյալ կարգավիճակից բխող ֆինանսական անկախության և կայունության համապատասխան կառուցակարգեր, ինչը համահունչ կլինի պետության կողմից ստանձնված պոզիտիվ սահմանադրական պարտականությանն ապահովել անձի իրավաբանական օգնություն ստանալու հիմնարար իրավունքը և այդ իրավունքի իրացմանը միտված փաստաբանության անկախությունն ու ինքնակառավարումը:

### **ՏԵՂԵԿԱՆՔ**

**«ՍՆԱՆԿՈՒԹՅԱՆ ՄԱՍԻՆ» ՕՐԵՆՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ ՕՐԵՆՔԻ ՆԱԽԱԳԾԻ ԸՆԴՈՒՆՄԱՆ ԿԱՊԱԿՑՈՒԹՅԱՄԲ ՆՈՐ ԻՐԱՎԱԿԱՆ ԱԿՏԵՐԻ ԸՆԴՈՒՆՄԱՆ, ԳՈՐԾՈՂ ԻՐԱՎԱԿԱՆ ԱԿՏԵՐՈՒՄ ՓՈՓՈԽՈՒԹՅՈՒՆՆԵՐ ԿԱՄ ԼՐԱՑՈՒՄՆԵՐ ԿԱՏԱՐԵԼՈՒ ԱՆՀՐԱԺԵՇՏՈՒԹՅԱՆ ՎԵՐԱԲԵՐՅԱԼ**

«Սնանկության մասին» օրենքում լրացում կատարելու մասին օրենքի նախագծի ընդունման կապակցությամբ նոր իրավական ակտերի ընդունման, գործող իրավական ակտերում փոփոխություններ կամ լրացումներ կատարելու անհրաժեշտությունը բացակայում է:

### **ՏԵՂԵԿԱՆՔ**

**««ՍՆԱՆԿՈՒԹՅԱՆ ՄԱՍԻՆ» ՕՐԵՆՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ « ՕՐԵՆՔԻ ՆԱԽԱԳԾԻ ԸՆԴՈՒՆՄԱՆ ԿԱՊԱԿՑՈՒԹՅԱՄԲ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԵԿԱՄՈՒՏՆԵՐԻ ԿՐՃԱՏՄԱՆ ԵՎ ԾԱԽՍԵՐՈՒՄ ԱՎԵԼԱՑՄԱՆ ՎԵՐԱԲԵՐՅԱԼ**

««Սնանկության մասին» օրենքում լրացում կատարելու մասին» օրենքի նախագծի ընդունման կապակցությամբ Հայաստանի Հանրապետության եկամուտների կրճատում և ծախսերի ավելացում չի նախատեսվում: